



Lok Sabha nung Home Minister
Amit Shah-i bill asem benok

Salah-i PFA player of the year
naroküm agizükogo



High Court-i Nagaland nung ANM/FHW recruitment agientsür

Dimapur, Luroi/August 20 (TYO): Nagaland Health and Family Welfare kübok Auxiliary Nurse Midwife (ANM) aser Female Health Worker (FHW) post 61 recruitment inyakyim ajunga Gauhati High Court, Kohima Bench-i agientsüogo aser Nagaland Staff Selection Board (NSSB) ajanga agiba tatidang nung tim masüba mapa jenti lir ta ashi.

Justice Mridul Kumar Kalita-i Mongulbarnü obendang agütsüba mapang, May 2024 nung ghonda 24 tsüngta shortlisted candidates indang lists meputep anaben agüja NSSB-i tali agi mapa inyak - mezüngbuba May 22 nü aser iba sülen tasüng metongshitsüba agütsüba nung kecha rasaa mashi petitioner 17 tenüng agien aser nisung tasen 68 tenüng inok, ta ashi.

"NSSB ajanga kuli tejangja magütsüi ananü atongtepa viva-voice atema teshimtet list balala ana agütsüba nung examination inyakyim nung tamang makatettsüsa akumer," ta Court ajanga ashi.

ANM/FHW shiba inyakyim nung iba ama tetsüngta nung mapang aliba ajanga nüburtemi tamang makateter. Iba yagi petition agütsür kisüng masü saka private respondents nem Constitution of India indang Article 16(1) nung temeden agüja aliba nung aibelener, ta ashi.

Eligibility criteria nunga metokmeperi aliba indang court-i tutettsü. Nagaland Nursing Services Rules, 1988 kübok qualifications ya "Class-X Standard with 2 years training as ANM/FHW" ta lir, saka state sorkari 2022 küm NSSB sangdong nung "10+2 (Diploma in ANM)" ta shia lira ser NSSB advertisement December 2023 nü agütsüba nung "2 years course in ANM" ta dang shia lir.

"Sorkari sangdong nung shia aliba educational qualification aser NSSB ajanga advertisement agütsüba nung shia aliba ya 1988 Rules den mapeter," ta Court-i ashi.

Iba ama meputep sangdong ajanga nüburtem rongnung kisüng masü saka tang ataloka aliba ama public authorities nunga mangatettep aser mangmangtep

PMAY-G scheme kübok Nagaland nem sen 55 crore jungnüa agütsü

Kohima, Luroi/August 20 (TYO): Central sorkari financial year 2024-25 asoshi PM-JANMAN densema Pradhan Mantri Awaas Yojana-Gramin (PMAY-G) scheme kübok Nagaland asoshi sen 55 crore jungnüa agütsüogo.

Iba osang ya Minister of State for Rural Development Dr. Chandra Sekhar Pemmasani-i Mongulbarnü Lok Sabha nung metetdaksü.

PMAY-G scheme kübok

adokdaksür.

May 23, 2024 nü corrigendum agütsüba nung petitioners tenüng indokba atema kecha rasaa shia mali, ta obendangeri ashi.

Anungji 23.05.2024 nü tashishitsü aliba corrigendum yagi Apex Court ajanga ozüng yanglua aliba majangteter... Iba sülen tezüluba nung jangjashitsüba ajanga kuli magütsüi corrigendum agüja aliba nung tanepsü mangur, ta Justice Kalita-i ashi.

Iba recruitment process nung temulung melemtetsüsa kumogo, anungji NSSB indang Combined Educational and Technical Services Examination 2023 ajanga ANM/FHW shimba maparen athitsüla aser May 22 aser May 23 lists ya mamshitsüla, ta Court-i totuyuba agütsü.

NSSB dang iba tatidang athiba indang osang kaket aser par website nung jangja-jangja sangdongtsü Court-i totuyuba agütsüogo.

Court-isa ANM aser FHW courses ya Nagaland Nursing Council aser Indian Nursing Council sako lir, saka training kümsük aser entry qualifications nung meputeper, ta ashi.

Indian Nursing Council ajanga agizüka aliba institutions nung ANM mesüra FHW courses agirtem shilem aйтdaksütsü mechi Nagaland Nursing Services Rules, 1988 ya yanglushitsüla aser iba mapa state sorkari anogo 45 tsüngta inyaktsüla, ta ashi.

Ozüng yanglushiba sülen anogo 15 tsüngta NSSB dangi requisition tasen yoktsüla aser NSSB Regulation 2020 indang Regulations 14 nung shia aliba ama tazüng aliba ANM/FHW posts atema nübu shimtsüla, ta Court ajanga ashi.

Sorkari nungi iba requisition arur anogo 15 tsüngta NSSB ajanga nüngdakba advertisement agütsütsüla, ta ashi.

Taoba mapang applicants tem mapang indoker aliba asoshi age relaxation agüja tanaben apply südaksütsüla aser advertisement tasen indang recruitment process ya ita trok tsüngta renemtsüla, ta Court ajangasa ashi.

Nagaland nung ki 48,830 yanglutsü lezmüksü, aser iba nungi ki 48,700 dak tema sanction asü aser tang tashinung ki 36,200 dak tema renemogo.

PMAY-G dangya Rural Housing scheme ta ajar, koba yimdak yimtsüng nung ki makaba kibongtem aser kutcha ki nung alir ajunga nem 2024 tashinung pucca ki agütsütsü nükjidong lir.

Iba scheme ya April 1, 2016 nung tenzüik aser Ministry of Rural Development ajanga ketdang asür.

Ceasefire Ground Rules yanglushitsü akhanger: CDVCA

Dimapur, Luroi/August 20 (TYO): Chümoukedima District Village Councils' Association (CDVCA) ajanga Chairman, Ceasefire Monitoring Group dangi züluba shiti ka nung Ceasefire Ground Rules reprangshitsü ayongzüka liasü.

CDVCA ajanga shiti nung ashiba agi, Government of India den Ceasefire Agreements zülutepba 'underground factions' indang designated camps ya telok balalai mapang shia mashi lenmang nung amshir, kechiaser item tesemtem ya mapa tamajung inyaker jenokdak tesem ka ama kumogo aser ozüng amshirtem item tesemi moteter.

Telok balala indang Ceasefire Supervisory Offices ta ajaba ya aiben nüburtem aliba tesemtiyong nung alir aser aiben senotsü agi alangzüksü yong mesüra tashiyim amshia senotsü meshitsü yong pua bener aoba civilian tem pua ayutsü atema amshir, ta ashi.

Item tesemtem telungi ozüng amshirtem marutettsü ta factions temi meshidak angatetdaksür aser parnoki ozüng alema inyakshangshiba Ceasefire Ground Rules agi nembangtsür. Anungji Ground Rules ya yanglushitsü akhanger, ta CDVCA-i ashi.

Item tesemtem nung mapa tamajung inyakertem jenokdaksür mesüra 'illegal detention centres' ama amshir ta osang tejangja angazükba sülen item tesemtem meita aotsü aser bushitsü asoshi Police nem

CFMB/CFMG ajanga temelaba agütsütsüla.

Civilian/nüburtem aliba tesem nungi factions balala indang Ceasefire Supervisory offices tem agientsüla aser designated offices tem tim masüba nung mamshitsü aser Ceasefire Ground Rules shidak amshitsü asoshi ozüng tejangja yanglutsüla, ta parnoki ashi.

Factions balala nung lenirtem yimjak nung nok-nü bener parnok meina bodyguards tem hadir tajung bener senzüba ya anentsüla. Iba ama inyakshangshi yagi nüburtem tetsübo aйтdaksür aser functionaries temi iba ama menügdakba yimya amshitsü melar ama kumdaksür, ta CDVCA ajanga ashi.

Ajidang masü, item functionaries nem yimjak nung nok-nü amshidaktsüba aser bodyguards anir senzüdaksüba ajanga tiazü nung parnok tashi ulura aliba ama angatetdaksür aser ozüng alema mapa tamajung inyaktsü temulung uludaksür. Card holders aser parnok indang PSOs/bodyguards temi parnok indang nok-nü miimbanga ayutsüla, ta ashi.

Card holders indang tejangja nüburtem nem metetdaksütsüla aser cards ya kanga kumdanga agütsütsüla, kechiaser card bena alirtemi item cards ya pei inyaknüba inyaktsü atema Government of India-i license agütsüba ama bilemer.

Government of India den

ceasefire nung aliba factions balala nungi cadres aika ED, NIA aser State Police ajanga mapa tamajung inyakba ken o nung bushir. Ken o karbo bail magütsütsüba warrants tema lir. Ajisüaka cadres tem Ceasefire agreements zülutepba sülen mesüra GoI den Ceasefire Agreements nung aliba telok nung adenba sülen, parnoki mapa tamajung inyakbatem miimbanger. Anungji aibelener nem tapet temerenshi agütsütsü asoshi ozüng shidak yanglua amshitsüla, ta CDVCA ajanga ashi.

Factions balala indang lenirtem nem security agütsüba ya menügdak, kechiaser iba yagi Police resources ajema kumdaksüba kisüng masü saka Police personnel tem tezü tangdaksür. Aser lenir timba card bena alirtem asünungji parnok sasep security lir.

GoI den Ceasefire Agreement nung aliba factions ajungai cadres shimba anentsüla, kechiaser cadres timba tashiyim amshia senotsü meshitsü mesüra ozüng alema mapa tamajung inyaktsü atema factions nung adener. Ajidnag masü, item factions temi nok-nü aliba anentsüla, kechiaser parnoki Naga political tebilemtsü nung tangatettep ka bener arutsü asoshi inyaker. Nübu tasen shimba aser nok-nü aliba ajanga parnok künü anogobo raratsü renemer ama angatetdaksür, ta CDVA ajangasa ashi.

Nagaland MBBS: Gauhati High Court-i Kohima Bench obendang soiter

Dimapur, Luroi/August 20 (TYO): Kohima nung army colonel arua inyaka alir ka jala Vatsala Panghal nem MBBS central pool quota kübok medical seat ka agüjang ta Kohima Bench kati Nagaland sorkar nem obendang agüja aliba Gauhati High Court-i soittsüogo. Iba ken o ano September 8 nü jembitsü.

Kohima Bench ajanga August 14 nü obendang agüja aliba ya tang atema mamshi atatsü Chief Justice Ashutosh Kumar aser Justice Arun Dev Choudhury indang division bench ajanga totuyuba agütsü, anungji MBBS menden ka soita atatsü aser ken o tembangba sülen ang iba

menden asoshi nübu shimtsü.

2025-26 atema Nagaland nung MBBS menden 152 lir, kong medical facilities peria maliba states nem central pool nungi menden 42 Centre-i lezmüksüba dena lir. Panghal ya 1 Nagaland Battalion NCC indang Commanding Officer ka jala lir, shibai NEET nung 455 ngutet, koba state merit list nung jenjang tanabuba nung aliba candidate dang nungi temaba lir. Ajisüala 'list of provisionally selected candidates' nung la tenüng maden.

Anungji lai Kohima Bench nung ken o benok aser Union of India indang counsel-ia la bhukuma nokdak.

Aser single judge, Justice Mridul Kumar Kalita-i Directorate of Technical Education dang central pool menden tazüng aliba ya Panghal nem agüjang ta August 14 nü totuyuba agütsü.

Nagaland sorkaria tebu küm ka Nagaland nung positing aliba kisüng nung ajemdaker 2025-26 atema Nagaland asoshi MBBS menden 42 lezmükja aliba nungi menden ka la nem agütsütsü tasak asütsü ta ashi.

Iba mechi NSF-ia August 19 nü Kohima nung longkak ait aser Naga nunger lisopur masür nem State quota magütsütsü ta nokdaker.

NCD ketdangpur tasentem tenangzüktepba sentong agi

Dimapur, Luroi/August 20 (TYO): 2025-2030 tenure atema Naga Council Dimapur (NCD) ketdangpur tasentem tenangzüktepba sentong August 20 nü Dimapur Town Hall nung agiogo.

Sentong nung alakteta jaoker ama o jembiba mapang Dimapur Deputy Commissioner Dr. Tinojongshi Chang-i, mapa toktsüba ketdangpurtem nem parnoki bendanga agüja tenzükba

atema tenüngsang agüja liasü. Dimapur nung aliba nüburtem atema parnok mapa aser parnoki District Administration den longjemer inyakba atema-a tenüngsang agüja liasü.

Ketdangpur tasentem nem tenüngsang agütsüba mapang DC-i, NCD lenir ka asütsü shimba ya meraket jenjang ka dang masü saka nüburtem ajemalua, tasüita aser nükla tajung yur tenzüksüba khuret lir, ta ashi. Paisa, lenisüba

nung pei jurila ajangzüksü atema minyaktsüla saka terenlok bener arutsü atema longjemer inyaktsüla, ta ashi.

Maneni DC-i, ketdangpur tasentem dang parnok mapang ajak odangtetsüsa ochishia inyaktsü aser shinga sentoka metoktsütsü, lanurtem ya tarutsü lenirtem ama parnok nem tashi agütsütsü aser tientet rongotem shisatsü agitsü ayongzüka liasü.

(Maneni tapak 2 nung...)

DoSE-i RIMC entrance tatidang indang metetdaksü

Dimapur, Luroi/August 20 (TYO): Directorate of School Education-i sangdong ka ajanga, Rashtriya Indian Military College (RIMC), Dehradun nung Class VIII nung azüngtsü atema tetsür aser teburtem asoshi July 2026 term atema Entrance tatidang 2025 küm December 7 nü agitsü ta metetdaksüogo.

RIMC, Dehradun nung admission agitsü atema tetsür aser tebur naprongla temsüa lir. Candidate tem ya 2026 küm July 1 nü tashi nung arishi küm 11½ nung 13 tsüngda alirtem asütsüla. Parnok ya 2013 küm July 2 sülen asortem asütsüla aser 2015 küm January 1 sülen asortem masütsüla.

Candidate tem ya 2026 küm July 1 nü RIMC admission agiba mapang züngoksema aliba school mashi ka nung Class VII nung azüngertem meüsa Class

VII pass sür alir asütsüla.

Tatidang nung written ya Mathematics, General Knowledge aser English nung agitsü. Mathematics, General Knowledge aser English paper tem ya December 7 nü 0930 nungi 1100hrs, 1200 nungi 1300hrs aser 1430 nungi 1630hrs tsüngda agitsü. Written tatidang ajangtetba candidate tem atema interview agitsüba anogo ya mapangtong nung metetdaksütsü.

Prospectus den Application Form aser question paper tejen booklet ya <https://admission.schoolmitra.com/#/admission/newEnquiry/6396eff3fc26e41841a5afd6> nung online ajanga taah agütsür mesüra self addressed slip forward sür aser account payee bank demand draft speed post sür sütettsü. General Candidate tem atema sen 600 aser SC/ST

Candidate tem atema sen 555 agitsü.

Demand Draft ya THE COMMANDANT, RIMC FUND", DRAWEE BRANCH, HDFC BANK, BALLUPUR CHOWK, DEHRADUN, (BANK CODE -1399), UTTARAKHAND dangi yoktsü.

Maneni application den külemi passport size photographs 2, Domicile Certificate, Aadhar Card (Photocopy (anatsülen), Municipal Corporation-i agütsüba Birth Certificate, ST/SC Certificate aser tang tezüngdak aliba school Principal nungi original Certificate den candidate zünga aliba class aser date of birth indang osang agüja attested photograph ka Directorate of School Education nem 2025 küm October 15 nü tashi nungbo agütsütsüla.

Pensionerstem physical verification agitsü

Dimapur, Luroi/August 20 (TYO): Kohima North Treasury nungi pension agirtem ajak CTR 368 dak ajemdaker taküm atema physical verification teküboklen agüja aliba anogotem nung agitsü.

1. Pensioner (life/family) W.E.F. 08.09.2025 nungi 12.09.2025 aser 15.09.2025 nungi 17.09.2025 tashi

2. Mapang- 09:30 nungi

Pensioner ajak dang pei book serial number repranger lemzüka aliba anogo verification atema arutsü metetdaksüogo. Pensioner tem shirnok yareta shirangba ajanga physical verification atema maruteter parnoki pei ki address den contact numbers agütsütsü metetdaksüogo, ajita asünungdang verification atema

ketdangsürtem yoktettsü.

Temalen shilem aliba anogo alema physical verification atema anogo matsülangtsü ta metetdaksüogo. Maneni 2025 küm September it atema pension ya physically verification magiba pensioner tem nem magütsütsü. Physical verification atema nüngdakba kuli kaketter:

1. PPO Books
2. Life certificates duly attested
3. ID card issued by Pensioners Association

Pensioners mesüra parnok melena inyaksürtemi Life certificate ya website <https://treasuries.nagaland.gov.in> nungi print sütettsü mesüra Treasury nungi office mapang agizükettsü ta kasa sangdong ajanga metetdaksü.

Kohima DC-i DDCMC senden ayonger

Dimapur, Luroi/August 20 (TYO): Kohima Deputy Commissioner, B. Henok Buchem-i sangdong ka ajanga District Development Co-ordination and Monitoring Committee (DISHA) senden August 28 nü Deputy Commissioner's Office, Kohima Conference Hall nung 1:00 ako nungi tenzüka amentsü ta metetdaksüogo.

Committee züngsem ajak dang iba senden nung tamakok

maludaksüi arua shilem agitsü mepeshia metetdaksüogo.

Maneni Project Director, DRDA, Kohima; District Welfare Officer/ District Program Officer, Kohima; Executive Engineer, PHED (Urban), Kohima aser Executive Engineer, PHED (Rural), Kohima nunger dang kasa senden nung parnok department inyakyim indang presentation kaka agütsütsü tetuyuba agütsüogo.

State Level Award atema application tem jaoker

Dimapur, Luroi/August 20 (TYO): Directorate of Industries & Commerce-i, Nagaland nung aliba lisopur artisan tem Handicraft aser Tribal Textiles dak sendakba nung State Level Award atema application tem jaokogo.

Applicant kaji Nagaland nung aliba bonafide artisan ka asütsüla, shiba handicraft aser tribal textile sector nung tajemba agi küm pongubosa sendaka alitsüla aser arishi küm 18 tema asütsü nüngdaker. Sorkar tenzükertem iba atema apply asütsü temsüa mali.

Application Form ya September 1 nü nungi tenzüka Textile Branch, Room No. 62

(Top Floor), Directorate of Industries & Commerce, Kohima nung mapa inyakba anogotem nung anepdang 9:30 ako nungi nikongtsütsü 4:00 ako tashi nung angutsü.

Application Forms ya tsüngtong arua kasa office nung samples/ articles den Textile Branch, Room No. 62 (Top Floor), Directorate of Industries & Commerce, Kohima nung September 30 nü tashi nungbo benoktsüla.

Atakzükja aliba anogo süitemba sülen application benokbatem magizüktsü. Craft category tem ya form den keta alitsü.

Sakra World Hospital-i alizüng tasen tongtetogo

Dimapur, Luroi/August 20 (TYO): Sakra World Hospital-i, alizüng tasen ka tongteta iba mozüki ya Karnataka nung robotic cardiac surgeries 550 dak timba agiba mezüngbuba mozüki kümogo aser iba den alima ajunga nung iba alizüng takaratiba tongtetba centre kümogo.

Iba alizüng ya küm asem tsüngda tongteta liasü aser küm nungi küm terenlok shilem 40 liasü. Sakra ya minimally invasive cardiac car dak sendakba nung global innovation nung tejakdang lir.

Taoba küm asem tsüngda Sakra-i India nung ajaki kanga sapua bushiba robotic cardiac

surgery program tem yangluogo. Shirangertem ya shilem 30 nungi 40 tsüngda Bangalore adena or tanga tesem nungi arur kong bendanglen nungi arur shilem 10 lir. Iba sentong kübok nisung arishi küm 15 nungi 84 tsüngda alirtem takok ngua temang anepalutsüogo.

Niuland nung UDYAM Registration drive agiogo

Dimapur, Luroi/August 20 (TYO): Enterprise (UDYAM) & Food Safety and Standards Authority of India (FSSAI) Registration drive ka Niuland Town Council Hall nung August 19 nü agiogo.

Department of Industries & Commerce aser Nagaland Industrial Development Corporation Limited under

Raising & Accelerating MSME Performance (RAMP) Scheme na longjemer iba sentong ayongzüka liasü.

Registration drive sentong nung nisung 80-i shilem agi aser parnok rongnung entrepreneurs 60 UDYAM atema züngoksem aser parnok 20 chiyongtsü dak sendakba shishilemba balala atema FSSAI registration

asoshi apply süa liasü.

Functional Manger Itsato Zhimomi-i okila jembi aser RAMP team Niuland-i UDYAM & FSSAI nükjidong aser tajangzüktem indang lemsatop. Iba sülen kiosks teyari nung ketdangsürtemi sentong nung shilem agirtem UDYAM & FSSAI nung züngksemtsü atema teyari agüja liasü.

NCD ketdangpur tasentem tenangzüktepba...

(TAPAK 1 NUNGI...)



Naga Council Dimapur ketdangpur tasentem tenangzüktepba agiba noksa nung angur.

Tir o jembiba mapang mapa toktsüba tir Etsungmomo Kikon-i 2020 nungi 2025 küm tashi parnok tenure mapa takoktem indang metetdaksü, kong Dimapur nung nisung aremba yimya tasen benokba, District Planning & Development Board-i representative yokba, Naga Council Dimapur küm 75 ajungba mung amungba, Naga Cemetery tasenba atsülangshiba

asir Council indang office building atema senotsü agütsüba densema liasü. Paisa, Dimapur nung world-class saisabong aser terenlok atema Council bendanga agütsür aliba nenshia metetdaksü.

Ketdangpur tasentem aser councillor tem tenangzüktepba agiba sentong Nomination Committee mendenbuba Hokuto Zhimomi lenisüba nung agi, aser BSI Dimapur Auxiliary, Christian

Forum Nagaland and NCRC & CRC International Council tir Rev. Dr. N. Paphino-i team tasenba bendanga agütsü sarasadem ayongzüka agi.

Sentong ya DRBC Pastor Rev. Tenga Seb-i sarasademertenzük. Mapa toktsüba aser tir tasenba natia o tatsütsü jembi aser Councilor, Imtisangba Aier-i tepela o jembia liasü. Iba sentong ya Ben Pamai lenisüba nung agia liasü.

2025-2030 tenure atema Naga Council Dimapur ketdangpurtem:

- | | |
|----------------------|---|
| 1. G.K. Rengma | - President |
| 2. M. Biremong | - Vice-President (Administration) |
| 3. M. Sapong Chang | - Vice-President (Council Bench) |
| 4. L.K. Peter | - General Secretary |
| 5. Levusie Nyuthe | - Joint Secretary (Administration) |
| 6. Thejangule Kire | - Joint Secretary (attached to President) |
| 7. Medovii Koza | - Finance Secretary |
| 8. Tiatesmu Longchar | - Media Cell |
| 9. Hotoshe Sumi | - Treasurer |



August 20, 2025 nü Moscow nung External Affairs Minister, S Jaishankar-i Russia nung shisashirtem aser think tank züngsemtem den senden amendang tangokba noksa nung angur.

Lok Sabha nung Home Minister Amit Shah-i bill asem benok

New Delhi, Luroi/August 20 (Agencies): Bodhbarnü Lok Sabha nung Union home minister, Amit Shah-i bill asem benokogo; item bill ji ozüing alema inyakba atema Ato kilonser, Union minister tem, chief minister state/UT minister tem agientsü atema lir.

Ozüing alema aibelenba ken o nung nung tai tonglokja pura mesüra anogo 30 tashi tepuokdak yura Ato kilonser, Union Ministers, chief minister aser state minister tem menden nungi agientsü nükjidong nung item bill benok.

Bills asemji Constitution (One Hundred and Thirtieth Amendment) Bill, 2025, Government of Union Territories (Amendment) Bill, 2025 aser Jammu & Kashmir Reorganisation (Amendment) Bill, 2025 lir.

Amit Shah-isa item bill ji maneni reprangshitsü atema joint parliamentary committee ka nem agütsütsü atema benok.

Taoba mapang Delhi chief minister Arvind Kejriwal aser Tamil Nadu minister V Senthil Balaji nabo ken o balala nung apuba sülen menden nungi maneni liasü.

Linük temzüing nung ozüing alema inyakba atema Ato kilonser mesüra minister tem agientsü atema ozüing mali. Union, state saser Delhi sorkar level nung ozüing alema inyakba atema pura minister tem menden nungi agientsü atema iba bill kübok Arrla 75, 164 aser 239AA yanglushitsü benoka lir.

Tang Government of Union Territories Act, 1963 nung

ozüing alema inyakba atema chief minister mesüra minister ka menden nungi agientsü atema shia mali, ibayongji Government of Union Territories (Amendment) Bill, 2025 kübok ozüing alema inyakertem menden nungi agientsü atema Arrla 45 yanglushitsü benoker.

Tang aliba Jammu and Kashmir Reorganisation Act, 2019 kübok ozüing alema inyakba atema chief minister mesüra minister tem agientsü atema shia mali, ibayongji ozüing alema inyakba chief minister aser minister tem agientsü atema Jammu and Kashmir Reorganisation (Amendment) Bill, 2025 ajanga Arrla 54 yanglushitsü benoker.

Item bill aija AIMIM tongti lenir, Asaduddin Owaisi-i, "Item Bills ya tasümgang süngden nung kojat tatembangbuba lir. Ni Jammu and Kashmir Reorganisation (Amendment) Bill 2025, Government of Union Territories (Amendment) Bill 2025 aser Constitution (One Hundred and Thirtieth Amendment) Bill 2025 ji anemer. Item bill ya 'separation of powers' anema lir aser sorkar shimtsü atema nüburtem nem agüja aliba tashi ajema kümstsür. Tilateri nung tali tongloksüba aser memelung malemba kija nung ajemdaker tai tonglokja alirtem menden nungi agientsü atema obendanger ama inyaksü asoshi executive agencies nem tashi agütsür," ta metetdaksü.

Owaisi-isa, "Iba sorkar yagi Police State ka tentettsü

meranger. Iba ya shima aliba sorkartem tasümgang süngden nung kojat tatembangbuba asütsü. Iba linük ya police state ka kümdaksütsü atema India temzüing yanglushir," ta metetdaksü.

Lok Sabha nung Opposition lenir aser Congress MP, Rahul Gandhi-ia Amit Shah-i benokba bill asem aija, asenok akhi putu dangi meyipa aoer, kong chuba kati pai melungba ajak anendakja liasü, ta ashi.

Item bill benokba atema BJP-i aniba Centre sorkar aija Rahul-i, "Tang BJP-i benokba Bill tasenba dak sendkaba inyaksangshi aika lir. Asenok akhi putu mapang dangi meyipa aoer, kong Chuba kati pai melungba ajak anenja liasü. Pai nü tejak mereprangnürä pai Enforcement Directorate dang pa anema ken o benoktsü tuyur aser nüburtemi democratic inakyim ajanga shimtetba nisung ka anogo 30 tsüingda anentsür," ta ashi.

Taoba linük tatong Tir Jagdeep Dhankhar-i ajungbena menden nungi anenba atema tasüingdangba kaa Rahul-i, "Iba denji külemi tatong Tir tasen ka shimtsüsa akümba ya kechiba?, ibaji asenoki mamadokli. Yashi ni kar den sensaksema liasü aser ni yamai ashi- tatong Tir tejenba kongi ao?. Pa oadokogo. Kechiba pa atsüker. Tatong tir kati pai kecha mejembittetsüsa tensa ka nung ali asü. Rajya Sabha nung kanga yakyaka aliba nisung ka ajungbena oadokogo aser ola madoker," ta ashi. "Tang asenok iba ama tensa ka nungji alir," ta paisa shisem.

LS nung Promotion & Regulation of Online Gaming Bill, 2025 benok

New Delhi, August 20 (Agencies): Online gaming sector ajungkettsütsü aser ozüing yanglushitsü atema Bodhbarnü Lok Sabha nung Promotion and Regulation of Online Gaming Bill, 2025 benokogo.

Lok Sabha nung Electronics and Information Technology Minister, Ashwini Vaishnaw-i Promotion and Regulation of Online Gaming Bill, 2025 ya benok.

Iba bill kübok computer resource, mobile device mesüra internet amshia online ajanga sen asayatsü ajungshitsü, sen asayaba ketdangsuba, advertise asüba aser sen asayaba nokdangtsü.

Iba bill ya talisa lanurtem sen asayaba ajanga loktiliba, rongsenkettzüing aser shisatsü mejungi kongshiba nungi kümzüksü atema lir.

Digital technologies timi amshitsü, loktiliba nung tesünep alitsü aser public health kümzüksü nükjidong nung iba bill benoker.

Taküm küm tetenzüklen Parliament nung jembidang minister Vaishnaw-i, internet amshirtemi timi amshitsü nükjidong nung sorkari mapatong balala benoker, ta metetdakja liasü.

Iba nükjidong ataloktsü atema Centre sorkari senotsü transactions aser user data kümzüksü atema inyaker, ta pai Lok Sabha nung metetdakja liasü.

Vaishnaw-i, online gaming sector nung income tax atema sorkari Finance Act, 2023 ajanga online games nung takok anguba atema saru shilem 30 latet, aser ibaji 2024-25 kümsük nungi mapa küma benoker, ta metetdaksü.

Iba dak alia sorkari 2023 küm October 1 nungi online gaming nung GST saru shilem 28 agir. Online money gaming supplier-i Simplified Registration Scheme kübok registration ka dang agitsü, aser ibaji Integrated Goods and Services Tax Act, 2017 (IGST Act) nung lir.



August 20, 2025 nü New Delhi nung Congress lenir Priyanka Gandhi Vadra aser la kinüingbu Robert Vadra na den jabaso, Raihan nungeri Veer Bhumi nung taoba mapang Ato kilonser Rajiv Gandhi asoba anogomong nung asür nem akhüm agütsüdang tangokba noksa nung angur.

Doctor temi SC dang azü dak sendakba tetuyuba soita alitsü mepishir

New Delhi, Luroi/August 20 (Agencies): India tesem balala nung doctor tem aser veterinary doctor temi shidi ajanga Chief Justice of India (CJI) dang, kibur maliba azütem shelters nung puoka yura 'zoonotic' tashidak balala poktetsü, anungji Supreme Court tetuyubaji soita atadaksüner, ta mepishiogo.

August 11, 2025 nü Supreme Court-i Delhi-NCR nung kibur mali nemzüba azü ajak pua shelters nung ayutsü atema tetuyuba agüja liasü.

Delhi nung aliba RML Hospital nung Dean, Arti Maria-i Instagram ajanga, "Shelters nung azü aika puoka ayuba ajanga zoonosis poktetsü aser tesem tilaka nung azü aika pudena ayuba ajanga parnok tashi meiti akümtsü. Azü dak poktetba tashidak balala ajanga meimchirtem, kibongtem aser talisa shelters nung inyakerem kongshitsü," ta metetdaksü.

August 18 nü Dr Rajeena Shahin-i, Delhi yimti lenmangtem nungi azü agienba ajanga shelters nung zoonotic tashidak balala poktetba den külemi rabies kanga poktetsü, ta metetdaksü.

Shelters nung azü jenti ayuba ajanga leptospirosis aser brucellosis poktetsü aser meimchirtem-a kongshitsü; tamalen Kerala nung aser 2023 küm South Carolina nunga item tashidak pokteta liasü, ta paisa metetdaksü.

Tenük doctor, Dr Neelima Seth, homeopath doctor Ashima Nath aser veterinary doctor Shivendra Pratap Singh nungeria, moapu tesadem nungi aliba azü pudena shelters nung shibanger ayuba ajanga zoonotic tashidak balala poktetsü, ta metetdaksü.

Supreme Court-i azü ajak pudena shelter nung ayutsü tetuyuba agütsüba sülen melungtet telok balala aser shiruru meimertemi iba tetuyuba anema longkak aiter.

University of Edinburgh nung ROH-Indies Research Project-ia sangdong ka ajanga, lenmang nung aliba azü ajak pudena shelters nung yura yimti lenmangtem nung azü melen tzü-ozü, shirong, tzünü aser 'skunk' ama kasa tashidak bena aliba shiruru kanga bulua akümtsü, aser meimchirtem atema ibajisa tamajungba asütsü, ta metetdaksü.



August 20, 2025 nü New Delhi nung NDA nungi tatong Tir candidate CP Radhakrishnan-i nomination paper file asüadang tangokba noksa nung angur. Kasa noksa nung Ato kilonser Narendra Modi, BJP National Tir JP Nadda, Defence Minister Rajnath Singh aser Union Home Minister Amit Shah nungera angur.



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 21, 2025

Trump kolok

Tang US nung Republican telok nungi tanaben adoksang, US tir Donald Trump jembishinü ya khen khenbo mashi mashi matumalem o jembir amai angateter. Aji oda, tamalen US tir inyakdang asenoki anguba aser jembiba angashiba purtem rongnunga Ronald Reagan, George H.W. Bush, William J. Clinton, George W Bush, Barack Obama aser Joe Biden nungertemi America yimten aser nübortem asoshi jembiba dang masü saka alima yimjung aser nübortem asoshi jembiba osü aser yimya den medemdangra, Donald Trump jembishinü yimya yabo khen khen asayamenür amai aser khen khenbo tokoloka shitak masü aküm amai jembiba amai reprangteter, anungji akhümкета merepranger aser terepranga jangratema merepranger. Ajisüaka, Trump jembishinü yimya ya terepranga ama masü aser tokoloka aseni bilemba ama masü, pai matu amai mashimashi jembia sayubaji pa nükjidong ka yur jembir, anungji pai jembiba o ji odang angar yutsütsüla o masü. Aji oda, pai Israel aser Iran na rara anendaktsüba aser India-i manganüaka, tawa India aser Pakistan na rara anendaktsüba shisatsü, tokolok aser tashiji ilaa bilemstüba mapa ka masü. Joko, Trump asoshi inyaktsüba rongdak nüngdakji Russia aser Ukraine na rara anendaktsütsüba mapa ya lir. Iba mapa ya pa asoshia pa US tir tanaben kümli inyaktsüba kanga rongdak nüngdak mapa ka liasü. Ibayongji, pa tir kümli, tamasa, Ukraine tir Volodymyr Zelenskyy pa alidak Washington-i jaok, ajisüaka kodang tena ajurutep alimaia mamangtsüka pai alima ajak nem ngudakja Zelenskyy ya tashi mangaba tanur chanu ka ama merenshia sayu. Iba ama mezügmeshiji magizükteti tejashi nung Zelenskyy senden alidak nungi oa adok. Ibaji alimai meimlaba tatalokba ka liasü, ajisüaka Trump asoshi alima yimtenren mapa aika nung Ukraine dang nungibo Russia tenügdakba liasü. Iba jagi dang US-i Russia tembar China aser Iran ama kintem mapa aika nung ola madokdaktsüi soita yutettsü. Iba jagi US-i Israel pusema Iran amakdanga Russia-i kecha meshitet, kasaji China dena jungteptsü lenmang lapok. Ano. US asoshi Russia nüngdakbaji North Korea tebilemstü ya ka asütsüa akok, kechiyong US tsükchirji North Korea lir aser Russia asoshibo North Korea-ji akang tembar lir. Item ajakji Trump mulungjang aser kolok nung yur, ano tangbo US tir Trump-i Russia tir par limai jaoka Ukraine den rara anentsü asoshi jembiba sülen Zelenskyy aser pa pusemer European lima Uk, France, Italy, Finland den ano EU aser NATO lenirtem külemi jaoka Russia aser Ukraine na rara anentsü asoshi jembiba kolok aser sentongji amata masü. Aji oda, EU lenirtemibo Russia aser Ukraine na tsünga 'Ceasefire' nung alidang rara anentsüba ken o jembiner, saka Trump asoshibo khen atema rara anentsü atema 'Ceasefire' alitsüba mapang endokba dang, anungji Ceasefire indang masü saka kenyongi rara anentsüba indang jembitsü asoshi bilemer. Iba amaji Trump tangatetba kolokji tangar dang nungi balaka alema orr bilemba shisa tulu aser tajung ka lir. Iba tangatetba nung, tang Trump-i bilembaji memenui Putin aser Zelenskyy na külemi jaoka par asem senden balaka amentsü aser idangji rara anentsüba indang jembitsü. Atangji, Ukraine asoshi kechi tamakoktsü aji mawashitsü asoshi Trump—i Zelenskyy dang shiadokogo aser Putin danga Ukraine ajunga agitsü asoshi tebilema mebilemi tang akaba agi tenük sünger pa danga talila mawashitsü atema temulungjang lapoka rara anentsüba ken o shidangogo. Parnok ajaki item o temji pei pei kidangi orr bilemdanga alitsü. Atangji, Putin asoshia Ukraine den raraba ya takoksa tulu lir aser Ukraine asoshia Russia den raraba ya nükenbelem aser shisabolu tulu lir. Tangbo kin anapronglai tongpang nung kanga meranga nokdaka lir, iba jagi EU aser NATO lenirtemi "Ceasefire" kanga rongdaka nüngdakba indang metetdaktsüogo. Ajisüaka, Trump-i ashi ama, akok nungbo Ceasefire mapang matai teraradak nung teti atema rara anentsü jembiba agiang rara temelaba anentettsü. Ibaji Trump kolok aser menua melii ataloktsü imlar.

OLEMSABANG

SALVATION REVOLUTIONARY MOVEMENT YA KECHI?

~ Takolong Chuchuyimpang

Tanü asen Naga lima ya nütsüng yongsük den metemdangra tazünger jenti aliba lima ka ta India nung ajaki jembir, saka tanü asen Naga lima raksaba ya yanglushitsü asoshi Nehmia ama tasü tait tazünger tajung Tsüngrem meteter aikabo malitsü südi ta bilemer. Nagaland for Christ ta ajaki jembir, saka tanübo India nung asen Nagaland ya most corrupted state No 1 list nung lir, süra asenok ya shidakba Khriatan tajung ka asü? India lima nung mezüng Yisu yimsü South India nungeri akizükba yong tangarbo tanü tashi parnok jakla ajungba yong alima kin ajaki South India nung tenüng asanger ya koda? Tanü asen Naga lima raksaba ya tangari masü ni aser na majungba agi raksa, tamasa ana tama melenshitsü nüngdaker. Asen Naga nung State ngur lia arudang mapa meranga inyaktsü to amatok aser joko (easy money) dak tenük ranglok aser pei taküm dangbo sen-ang tali meim, item temenen tera tamajungtem ajanga asen Naga lima corruption aser confusion agi asen Naga nung ajak tatempanglak (zenith) tongoko, joko asen Naga lima tajungba lima ka akümstü lenmang sadema mali kümogo. Tanü asen Naga lima aji oda raksa ao yonga asen Naga nung nüchiso bushiba wadangjibo anentsü makok, anungji dang aliba Putu lanurtemi shirnok tasü tait shisa taka lir, ano shirnok rongsen aser temetetba tulu lir, ajaki tarutsü asen lima meimra, kari rongsen agi, kari nübo ano kari shisatsü agi ta temelenshiba tajung ka Salvation Revolutionary Movement ka dang 21st century lanurtemi yongyar süra, zünger mapa mangurtem shirnok Graduate aser post-graduate lanurtem lir, tanü na kong ali? Kechiba nai ner lima asoshi nübo magütsür? Kechiba na amajok nung senti mapang intoker? Azü masü saka na nübu, India nung den perangpong (arms) amshia azü tokshiba tanü mapang masü, mapang tamajungtem suidemogo, joko mapang tajung dang anunga lir koba pen asen tekolok shisatsü. Naga nungeri India nung den azü sako masü anungji 3rd World war maru tashi asenoki nüchiso asoshi rara atatsüla. Tanü tsürabur tajung ka ama nenok lanur dang ya shinur, tamalen nüchiso bushiba wadang nung mezüngpurji asen Aortem liasü, saka tanü asen Aor kong lir? Tanü asen lima asoshi nübo tajung agüja nüchiso bushir telok aika lir, sürabangla koba telok nung asen Aor tanishir tajung ka (good leader) sür tejakleni anir aoba shiba ali? Nüchiso bushir nisungtemji ajakbo nisung tamajung dangbo masü tatem nung lanur dang ya shinür tanü nenoki tarutsü lanu putu meima lira, tamasa asen Naga lima yanglutsüla, tanabuba meraji nüchiso asoshi, saka azü tokshiba agi masü (not bloodshed but peace and faith) anungji talisa asen Aor lanurtemi asentenshia asen lima meima lira, nübo agüja Salvation Revolutionary Movement ka kangasa rongtak wadang ta ajiteta iba oset atemer.

Kuknalim

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisu Khrista baptiba tesem anasa museum ka yanglutsü



'Bethany Beyond the Jordan (Al-Maghtas)'

August 20, 2025: Yordan ayong nung Yisu Khrista baptiba nüngtem nung Yordan ayong anasa museum ka asütsü atema sentong renemogo.

Iba museum yanglutsü atema alima nung kanga nüngtugu architectural team tenet shima lir. Yisu baptiba tesem dang 'Bethany Beyond the Jordan (Al-Maghtas)' ta ajar. Iba tesem nung Yohan baptibai Yisu baptija liasü ta amanger.

Yisu baptiba sülen küm 2,000 ajungba küm 2030 nung iba museum lapoktsü aser iba museum ya UNESCO World Heritage Site 'AI-Maghtas' anasa asütsü.

Jordan linük nung King Abdullah II-i iba project tenzüka liasü.

Iba project ketdangser, Dr Tharwat Al Masalha-i, "Iba museum ya ajanga Khristan

puti otsü nung kanga temeshitiba tatalokbatem rongnung ka nem tetushi agütsütsü. Baptiba tesemji tesemdangertem atema meyipa reprangshiba, angazükshiba aser tanela renemshiba tesem ka asütsü," ta metetdaksü.

Khristan putiotsü nung Tebu, Techir aser Tanela Temeshi prongla jungkai adokba tatalokba kar rongnung Yisu baptiba ya densema lir. Alima tesem ajaklen Khristantem atema Yisu baptiba tesem ya kanga tongtibang.

Museum tasenbaji raliwalirtem aser temeshi ainlen jajartem atema kikümbang ka ama asütsü aser küm shia nisung 450,000-i iba museum semdangtsü imlar.

Iba museum ya tamangba yimsü balala amangertem ajak agizüksüsa yanglutsü.

Iba museum yanglutsü atema architectural team tenet rongnungi ka shimtsü. Design tetoktepba ajakji Malcolm Reading Consultants-i achaayangtsü.

Iba museum design asütsü atema tesüsa shimteta aliba team tenetji AAU Anastas (Palestine/France/Jordan), Heneghan peng architects (Ireland), Nğall McLaughlin Architects (UK), Studio Anne Holtrop (Bahrain/Netherlands), Tatiana Bilbao ESTUDIO (Mexico, Toshiko Mori Architect (US) aser Trahan Architects (US) lir.

Iba project nung dollar sen million 30 shi indoktsü.

Concept designs ji September, October mesüra November ita nung sayatsü aser tesüsa shimtetba team jia taküm küm tatembanglen sangdongtsü.

Pakistan nung Khristan anema inyakbaken o nung shinga maitsü

August 20, 2025: 2023 küm August ita nung Pakistan kübok Jaranwala nung Khristantem anema apusodang Tenla ki den Khristantem meyong kiojen aika rongdoktsüba sülen küm ana abensaogo, ajisüaka tang tashi iba ken o nung aibelenr ka danga maitsü, ta shia Pakistan nung Catholic bishop kati ketdangsertem sashia aitsüogo.

Iba tatalokba ya Pakistan nung Khristantem anema inyakba tatalokba tamajungtiba liasü, ajisüaka aibelenertem anema kecha meinyaker, ta pai metetdaksü.

2023 küm August 16 nü Pakistan nung Punjab province kübok Jaranwala nung Khristantem anema inyakba tatalokba dak sendakba nung Bishop Indrias Rehmat-i iba o ya jembi.

Khristan adianu anati Muslim nunger temeshi kaket shisatsü, ta tai tongloksüba nungi Muslim nunger lokti tulu kati Khristantem anema apusoa liasü. Lokti jagi Tenla

ki 26 rongdoktsü, Khristan ki 80 rongdoktsü, putirtem ki amak aser Khristan lepertem raksatsü.

Iba tatalokba dak sendakba nung nisung 5,200 nem tai tongloksü aser nisung 380 shi apu, ajisüaka parnok teimbaka bail nung chiokogo.

Ita ana tejaklen Faisalabad Anti-Terrorism Court-i Tenla ki ka rongdoktsüba ken o nung tai tonglokja alir nisung 10 maitsüi chiokogo, aser tang tashi iba tatalokba ken o nung nisung ka danga maitsü.

Osangbener den jembidang Diocese of Faisalabad nungi Bishop Rehmat-i, "Ochi temeden agütsütsüla. Police-i parnok teinyaktsü tim meinyak. Nisung shinga nem temerenshi magütsü. Iba ama tensa ka nung aibelener shinga nem-a temerenshi magütsütsüa akok, ta onoki bilemer," ta metetdaksü.

Khristantem ola nembangtsütsü atema yimsü alia amangertemi Khristantem amokmerener, ta paisa

metetdaksü.

"Iba tatalokba sülen küm ana süia arudang Khristantem melungsentsü melenshiogo, joko Khristantemi pei temeden atema raratsü melunga lir. Onoki ola adoktsü aser ayimdensü ta parnoki ashir," ta pai metetdaksü.

Pakistan nung putirtemi, Pakistan nung Khristantem anema inyakba puti otsü nung Jaranwala nung tatalokba ya tamajungtiba lir, ta ashir.

Iba tatalokba ya asalentong yanglur Arogo aser Khristantem kiojen anema inyakba lir, ta parnoki metetdaksü.

2009 küm Gojra nunga Tenla ki ana raksatsü, Khristantem meyong ki aika rongdoktsü aser Khristan 8 tepseta liasü.

2013 küm nunga Taliban teloki Peshawar nung Khristantem tekülem sentong tagidak mapang nung bomb amshia amakdang nisung 85 asü aser nisung 100 dak tali yirua liasü.

ANO GO ABEN TSÜNGREM DEN

Shimtsü Nüji

"Aser Kibuba Tanela lir, aser kechi nung Kibuba Tanela lir, idakji nüjiba lir"
(2 Kor. 3: 17)

Tanela agi sünga jajabaji temelaba agütsüba mesüra ozüngyim benshiba masü, saka nüji. Pauli ashi, "Pai tasen tezüngzüktepba tenzüker akümtsü onok peridaktsür; ibaji tezüluba ozüng masü.. ..kechi nung Kibuba Tanela lir, idakji nüjiba lir" (2 Kor. 3:6,7).

Asenok Tsüngrem den lungjemba agi anguba senti rongsen tajungtibaji Khrista nung nüji angubaji lir. Kibuba Tanela ne dak ali nung taküm alitsü asoshi shimtsübaji na nüji lir. Na tamalen aliba taküm ama shi nung mejajatsü ajungshir. Mesüra tanela nung jajatsü majungshir. Tanela-i mulungba ama mesüra shii mulungba ama jajatsü na nüji lir.

Tanela mulungba ama jajaba nung mapa ana keta lir. Mezüngbuba, ibai ola madoki alitsüba masü. Asenoki Tanela nung jajaba indang jembir, mena alitsü indang masü. Na tanela ainba nung lendong tulutibaji aser teraksa adokdaktsübaji ola madoki alibaji lir. Ne mulungjang tetsüngda ka nung alibaji lir. Tsüngrem-i mulungba inyaktsü asoshi mener atabaji tanela nung aintsü asoshi Tsüngremer lenmang masü.

Tanabuba nung, asenoki tanela nung jajatsü jembir, asemtsüba masü. Tanela nung sünga aliba takümji tanela maka aniseta inyakba agi mangur. Meranga inyakba jagi Tanela agi sünga akümer ta asenoki aibelena bilemer. Ibaji tekolok mapa lir. Na jakla (immoral) mejungi kümdaktsüba ajanga Tsüngrem tenzükba anendaktsütsü makoktsü akok ta Satani bilemtsü akok, saka nü mapa nung na kanga mazüangi yutsüba ajanga na akoktsü.

Kibuba, tanü ne mera nung Tanelai mulungba ama ni jajatsü kü dang yariang.

Uttarakhand sorkari anti-conversion ozüng ano tesashiba yanglur

August 20, 2025: August alitsü atema ozüng 13, 2025 nü Uttarakhand state yanglushir," ta metetdaksü.

sorkari anti-conversion ozüng State sorkari, tang ozüng ano tesashiba yanglutsü atema yanglushiba ajanga sensotem telemtetba agiogo; iba ozüng yimsü temeden kümzüka kübok ozüng alema yimsü ayutsü, yimsü meyipdaktsüba meyipdaktsürtem nem nokdangtsü aser loktiliba nung temerenshi ano tuluba tesünep alitsü, ta agütsütsü, digital media metetdaksü.

ajanga yimsü dak sendakba Tang ozüng tasenba kübok osang lemsatepba nokdangtsü ozüng alema yimsü aser takoksa angurtem meyipdaktsürtem küm 14 kümüzüksü, ta International tashi tepuokdak ayutsü aser Christian Concern (ICC)-i ken o kar nungbo küm 20 tashi metetdaksü. tepuokdak ayutsü akok.

Uttarakhand nung ozüng Iba dak alia ozüng alema tasenba kübok social media inyakertem aputsü atema ajanga tamangba yimsü district magistrate nem tashi meyipdaktsütsü atema osang agütsüogo.

lemsatepertem nem Iba ozüng kübok temerenshi agütsütsü. 'mesüzüka yimsü

Uttarakhand Freedom of Religion (Amendment) Bill yanglushibaji Uttarakhand State Cabinet-i agizükogo.

Chief Minister, Pushkar Singh Dhami-i sangdong ka ajanga, "Uttarakhand ya tsüngremtem aliba lima ka aser akhidang nungi temeshi nisungtem arua külemba nung Hindu pilgrimage centers tesem ka lir. Tesüiba küm ishika tsüngda ozüng alema yimsü meyipdaktsüba ajanga temelenshi kar lir. Himalayan state nung loktiliba kasa dang

Himalayan region nung aliba Uttarakhand ya alima nung Hindu pilgrimage centers rongnung ka lir. Uttarakhand ya Uttar Pradesh nungi tasen razüka aoba state ka lir. 1624 küm nungi iba region nung Khristan yimsü liasü.

AO OSHI ANGAZÜKDAK:

TANÜ ANGAZÜKTSÜBA OJANG



Tesü

(n) tatsüjang ka dang aliba ak tayi (male animal with only one testicle)

* Ak tesü shi nung tezükнем menemtsü.

Tesüi

(v) süiadoker, mapang süir (expired, over age)

* Tesüi chiyongtsütem kodanga machitsüla.

OLONG PAITEP # 7246

	1				2	3				
4			5						6	
						7				
	8									
	9			10			11			
						12			13	
14										
						15				

TIPIEN		LANGTSÜNGLEN	
2. Sü jeplok	- (4)	1. ____ i	- (4)
4. O agi merenshi	- (5)	3. Kasa masü	- (6)
7. Ayongküм li	- (5)	5. Nüchi masü	- (5)
8. Chiyungtsü mapang süiadok-	(4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. ____ kibur	- (5)
15. Mejanga onü	- (5)	13. Tebur tembar tsüngda jatepba	- (4)
16. Tzü shiruru ka	- (4)		

OLONG PAITEP # 7245 TELANGZÜBA

TIPIEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong,	
10. Tsüngpang, 11. Tesangwa,		6. Lungkak, 7. Milak, 9. Zünga,	
13. Aoksa, 15. Putir, 16. Yipru.		10. Temopu, 12. Walu, 14. Ali.	

NAI-A YA METETTER MA



Toyota Kirloskar Motor Pvt. Ltd. (TKM)-i August 20 nü Camry Hybrid Electric Vehicle - Sprint Edition sayaogo, koba iconic luxury hybrid electric sedan tajungba küma yanglushir adokba lir. Gari nung dual-tone exterior, matte black enhancements aser exclusive sports kit keta lir. Camry Sprint Edition ya gari anishitsü jangraratem dak rangloker design süa yangluba lir.

GMCH nung kinü tanur ka asüba ken o nung nurse ka apu

Guwahati, Luroi/August 20 (Agencies): Gauhati Medical College and Hospital (GMCH) nung kinü tanur ka asüba dak sendakba nung Chief Minister Himanta Biswa Sarma tetuyuba nung Sister-in-Charge Bhanupriya Mishong anogo ka sota ayuba sülen Bhangagarh Police-i Mongolbarnü apuba dak sendakba nung hospital staff temi tebilemtsü ka-a bilemer.

Nurse karibo la kija apuba ya tim masü ta ashi, kechiyong iba lendong atalokba mapang Neonatal Intensive Care Unit (NICU) nung tanga staff tema aika liasü.

Hospital records ajanga iba tatalokba mapang Bhanupriya

densema nurse pongu, doctor asem, ward girls ana aser merekmejur ana densema liasü, ta sayuogo.

Bhanupriya den külem inyaktertemi ashiba agi, lendong atalokba mapang la mamatzü yanglutsü atema khen asoshi takdang toktsür or liasü. Parnokisa lai achaayanga aliba takdang nung tanur 26 masü saka 35 liasü, ta ashi.

Nurse temisa Superintendent and Principal Achyut Baishya-i agütsüba osang ya koba tashi ka shitak aji ashishiogo.

Staff temisa staff agi anüngba tebilemtsü lemsatepogo aser ashiba agi,

takdang shia nurse asembo nüngdaker saka kaka dang yoker.

Temang tendangba sülen Bhanupriya ya Panbazar Police Station-i anirogo. Kasa mapa nung la den külemi inyaktertem Bhangagarh Police Station nung adenshir la dang masü saka lendong atalokba mapang duty nung alirtem ajak aputsü mepeshia liasü.

Iba ken o ajanga duty nung aliba doctor tem dak kechiba tai metongloktsü iba indang tasüngdangba adokogo aser kari ashiba agi, nurse ka apuba dak ranglokba ajanga GMCH nung ken o tulutem amokbangtsü akok.

Garo nungertemi Garoland statehood takhangba Delhi-i bener ao

Shillong, Luroi/August 20 (Agencies): Meghalaya nung Garoland state ka asoshi mapang talangka khanga arudar aser tanga Garo nung lenirtemi iba takhangba ya linük yimtibai benerogo.

Acting mendenbuba Balkarin Ch Marak-i anir Garoland State Movement Committee (GSMC) züngsemtemi Constitution Article 3 kübok Garoland ka kümtettsü asoshi tezüluba nung temepishiba ka agütsütsü atema Union Minister of Tribal Affairs Jual Oram den Mongolbarnü ajurutepogo. Article 3 yagi state tasen kümtettsü aser tang state arrtsütem agizüksü atema Parliament nem tashi agüja lir.

Tanga GSMC züngsemtem rongnung publicity secretary Chevibirth Koknal, assistant general secretary Tony Balsam Ch Marak, executive member

Amresh Ch Marak, aser organizing secretary Jason Tekrang nung densema liasü.

Tezüluba nung takhangba agütsüba nung Garoland atema takhangba ya 1895 küm nungi tenzüik. Iba küm Garo nung lenir Sonaram R Sangma-i British yimsüsüba mapang mezüngbuba tetsü tasoli balaka atema ayongzüka liasü, ta shia lir.

Iba sülen Mody K Marak aser Emonsing M Marak nung densema lenirtemi Assam aser Mymensingh tesem (tang Bangladesh nung lir) nung aliba Garo nung aliba tesemtem ajak India kübok longjemtsü ayongzüka liasü.

Tang benoka aliba Garoland state yagi Meghalaya anüolen tesadang ka ayimjemtsü, kong State indang Assembly constituencies 60 nungi 24 densema lir.

GSMC-isa, Garo Hills Autonomous District Council (GHADC) nung itasen mapa shitak nung magütsüba mepetmesü, infrastructure terenlok, sobaliba agizükba yimya aser Garo sub-tribes 12 prongla atema Nokpantes (bachelors' dormitories) yanglua sobaliba rijutem wazüka ayutsüba amala ken o tem benoka liasü.

"GHADC employees 1,350 dak tema ita 43 tashi itasen mongui inyakdar aser iba ajanga timtem takangshi tulu adoker aser iba ajanga Sixth Schedule kübok council-i constitutional duties shitak benoka minyakteti arudar," ta Tony Marak-i ashi.

GSMC-i ashiba agi, Minister Oram-i temzüng ozüing dak ajemdaker parnok takhangba tem asadangtsü ta tenangzüka agütsüogo.

Osangbener tejentem jaokba atema Gaurav Gogoi-i Assam Police aitsü

Guwahati, Luroi/August 20 (Agencies): Lokti rongmesoba ken o ka nung The Wire nungi osangbener tejen Siddharth Varadarajan aser Karan Thapar na jaokba atema Congress lenir Gaurav Gogoi-i Bodhbarnü Assam Police aitsüogo aser ashiba agi, state ya tanga tatalokba taika atema osang balala nung adokdar.

Osang bener ana jaokba dak sendakba nung Gogoi-i,

Assam ya "merumeru, ochi mashi, temsüa maliba, temzüng ozüing shidak benoka inyaksangshi masüba agi süngogo," ta ashiba den iba amala inyakyim ajanga chichiba Assam inyakyim mesayur, ta shisem. Paisa, Assam nung aliba nüburtemi parnoki bilema aliba ama Assam ka yangertsü atema lenirtem aginer, ta ashi

"Greater Assam ka

Assamese principle aser sentiment tem dak ajemdaker yangertsü aser iba atema kin, tamangba yimsü aser oshi balala jembiba tesangra aser sempet aketba lanur million aikati tashi agütsütsü," ta X nung post ka ajanga Gogoi-i ashi.

Osangbener ana dang ya Guwahati City Police crime branch matsüngda August 22 nü nokdaksü tetuyuba agütsüogo.



Imphal: Arem wazüka ayutsü atema Central Forest Division-i Bodhbarnü Imphal East district kübok Heingang Reserve Forest nung ali atsünger alirtem aninba sentong ka ayongzüka agiogo. Ketdangsürtemi ozüing alema sür aliba ki 18 benja liasü.

Putin aser Zelenskyy senden amentsü ya tongtipang masü: Kremlin



Moscow, Luroi/August 20 (Agencies): Russia Tir Vladimir Putin aser Ukraine Tir Volodymyr Zelenskyy senden amentsü ya tongtipang masü ta Kremlin-i ashir, aser US Tir Donald Trump-i lenir ana dang Ukraine rara tatempang kati arutsü asoshi ajurutepea jembishinü akatsü maneni ajungshir.

US tiri taoba hopta Alaska nung Putin ajurua aser Hombarnü White House nung European lenir nisung tenet aser Zelenskyy pelashishia agizükba sülen lenir ana senden amentsü ya tali ajungshir.

Trump-ia iba rara bentettsü ya tasak asütsü ta nangzük aser Russia tiri iba tsükchitep tatem kati arutsü tejangraba mali asütsü akok ta ashi.

"Hopta ka-ana tsüngta Tir Putin tebilemba metettsü. Pai tezüngzüktep meyangluner alitsüa akok," ta Trump-i Mongulbarnü ashi.

Yamaji asünungbo Putin tensa tamajung ka ajurua lir, ta pai tongmelang agi ashi.

Mezüngbo Putin aser Zelenskyy par asem senden amentsü meranga liasü, saka tangbo pa medeni tena kisüng mezüng ajurutepea tajungba asütsü, ta Trump-i ashir.

Nüngdak dang süra tena senden nung ni adentsü, saka kechi koba tashi ka jembishinüa aor ta reprangner, ta pai ashi.

Hombarnü Russia tiri Trump dang Ukraine den indang-indanga jembishinü akatsüba tasa ya junger ta shia liasü, saka tasüngji Foreign Minister

Sergei Lavrov-i tejangja masüba sentong nung teimla kangabo malitsü ashi.

Kechi senden südir süaka tanem-tanem expert level nungi tenzüksüka aser iba sülen nüngdakba mera ajak agitsüla, ta pai ashi.

NATO indang mitkar lenirtem Bodhbarnü virtual meeting ka amentsü imlar, aser UK indang military chief Admiral Tony Radakin ya Ukraine nung 'reassurance force' yoktsü indang jembishinütsü atema Washington-i aor.

Putin-i Trump dang jembishinütsü asoshi Zelenskyy ya Moscow-i arutsüla ta ashi, ta osang kar ajanga ashir, koba Ukraine-i kodanga magizüksü amai ajiteter.

Tesüiba anogo ishika tsüngta jembishinüa aruba ajanga Trump-i iba rara tebenja aser Moscow-i akhangba aser Kyiv jenjang tali tajungba nung angateter.

Pai Putin nem ceasefire ka mulunga agizükdaktsütsü ta mezü-mekuma jembiba asangsang nung mapa kuma meinyakteter aser tangbo US tiri Ukraine aser Russia tsüngta teti yimjung alitsü asoshi tezüngzüktep ka indang-indanga yanglutsüla ta ashir, ajisüaka Ukraine asoshi security guarantees agütsütsüba tsütsü lenmang lepboka lir.

Yimjung tezüngzüktep ka yanglutsü asoshi iba ama mera ya Kyiv indang sovereignty asoshi tongtipang lir ta Zelenskyy aser European

lenirtemi Trump nem angatetdaksü amai ajiteter.

Ceasefire mesüra yimjung tezüngzüktep ka yangula European linük tem nungi sepaitem Ukraine nem agütsüra US-i anünglen nungi parnok yaritsü mulunga lir, ta Trump-i Mongulbarnü ashi, saka pai US sepaitem yoktsübo mashi.

Ajisüaka US tiri anünglen nungi teyari agütsütsü ta ashiba nungya itdangiterba mesüra fighter jets aser war planes amshitsüba alia-maliar mashi.

Trump tebilemba ya tejangja masü, saka France aser UK nati aniba "coalition of the willing" teloki rara temra Ukraine dangi 'reassurance force' yoktsü atema sentong tejangja yanglu tenzükogo ta ashir.

Mongulbarnü iba telok ya virtual yimya nung senden ka amenba sülen Downing Street odongtar kati ashiba agi, security guarantees tajung agütsütsü sentong nung tashi itshitsü asoshi US lenir den ajuruteptsü.

Putin den senden amenba aser tesüa Zelenskyy den ajurutepea sülen Trump yagi tangbo Ukraine aser Russia tsüngta indang-indanga jembishinüba ajanga peace deal ka anasai bener arutsü ama bilemere, saka lenir ana tsüngta mepelatep tulu lir ta ashi.

Putin aser Zelenskyy na 2019 nung tesüa ajurutepea lir. Iba sülen Moscow-i tashi ajak amshia Kyiv amakba ajanga nisung meyirijang aika tepsetogo, ki o jen tesem ajaklen raksatsüogo aser civilian dak tenük yoker anünglen nungi amakba mapang lir.

Putin-i Zelenskyy ya ozüng agi melaba lenir ka masü ama züngshir aser West tsütsüi Ukraine aoba ya pai inyaker ama repranger.

MULUNGNEN O



Obala Sentineken Walling
May 02, 1946 - August 15, 2025.

Onoki teti dang meima aliba Obala Sentineken Walling (Khar) shirang yipten nung aliba mapang nungi pa iba akümüli watang tembangba anogo tashi nung ozü shisabolu aser mangyim nüktzü agi sünger alidang, temeimertem kija, kibong, Arogo aser lokti tentet balala nungi shirnokisa nübo, rongsen, shisatsü aser sarasadem agi onok mulung sünepeja yaritepogo, nenok ajak dang onoki kanga pelaba lemsateper.

Ajak dangi tsüngdong arua ozü pelaba mulungnen o melemsateptetba asoshi sasar, ajisüaka asen teyanglur Tsüngremi nenok taküm aser kibong maneni moajangma ta onoki amanga sarasademtsür.

- Temeim Kinungsü, Chirnurtem, Tetsütamo, Semchirtem aser Kinungertem.

Office of the
Longkong Senso Mungdang
TENÜNGSANG AGÜTSÜR

Mr. Imtimeren aser Mrs. Temjenmongla na jala Mrs.Yashijungla Jamir, la inyakba wadang nung under Secretary nungi Deputy Secretary temaba jenjang tongtet nung Tsüngrem tenüng asanger aser sensosanger ajak tenüng nung L.S.M ajanga kanga pelaba sangdonger.

Maneni ne taküm aser maparen ajak nung temoatsü südakjangma.

Sd/-
Lipokmeren
Tir, LSM

Sd/-
Tinumayang
Tongti Zülur, LSM

GOVERNMENT OF NAGALAND
OFFICE OF THE DIRECTOR GENERAL HOME
GUARD, CIVIL DEFENCE
&
STATE DISASTER RESPONSE FORCE
NAGALAND, KOHIMA.

NOTICE

Dated, Kohima the 19th August '25

NO.HG/Estt(A)-3/ 2021/577: This is to notify that vide Advertisement NO.HG/Estt(A)-3/2021/998 dated 07th October 2024, the provisional result and other details are uploaded in the Department official website (www.hgcdsdrf.nagaland.gov.in).

Sd/-
RENCHAMO P.KIKON, IPS
Director General

Iran nungi meintoker Afghan nunger aika bus tsükokba nung asü



Kabul, Luroi/August 20 (Agencies): Afghanistan anüolen gari lendong ka ajuruba nung tanur 17 dena nisung 79 asü aser parnok ya timbaka Iran nungi meintokba Afghan migrants tem bus ka nung mena alirtem lir, ta Taliba interior ministry odongtari ashi.

Bus ya Kabul bushia aodang Mongulbar aonung truck ka

aser motorcycle ka den Herat province nung tsüktepa mi adok.

Bus nung mena alir ajunga aser danga gari nung alir ana asü, ta Herat nung Taliban indang director of information and culture, Ahmadullah Mottaqi-i osangbener dang ashi.

Afghan nunger pei tasoli nung rara aliba mechi jena aor tejangja masürtem Iran-i tawa

ka nungi tali meintok tenzükogo.

"Passengers ajunga migrants tem liasü, shirnok Islam Qala nungi mener arua liasü," ta provincial governor spokesman Mohammad Yousuf Saeedi-i Afghanistan-Iran arütsü anasa aliba jila ka athishia ashi.

Bus anisangi kanga kera aniba aser zübazüyima yutsüba ajanga iba lendong ya ajuru, ta

Herat police-i ashi.

Afghanistan nung gari lendong teti ajurur, kong küm aika raraba ajanga lenmang tem raksar lir aser gari aniba ozüng shidak mamshir.

1970s mapang nungi Afghan nunger million aika Iran aser Pakistan nung jenoka lir, aser parnok timba Soviet-i 1979 nung Afghanistan amakdang aser iba sülen 2021 küm Taliban yimsüsüba tanaben meyipa shilangba sülen ajen.

Iba yongji Iran nung Afghan nunger anemer tali akumer, kong refugee temi timtem tali ajurur.

Taoba mapang Iran-i tejangja kuli maka arua aliba Afghan nungertem July ita tashinung pei sasa ainshitsü anogo züngzükja liasü.

Saka June ita Israel den rara tatsüka raraba sülen Iran ketdangsür temi tashiyim

amshia Afghan nunger meyirijang aika meyipa yokogo aser national security tebilemtsü mechi inyaker ta ashir, saka iba inyakyim anemer temibo Israel-i amakdang security tsütsü tamakok ajuruba nembangtsü mechi Tehran-i yamai inyaker alitsü ta ashir.

January ita nungi Afghan nunger nisung 1.5 million dak tema Iran yutsür ogo, ta UN Refugee Agency ajanga ashir. Nisung karbo Iran nung putu aika liasü.

Mongin temi Taliban sorkar kübok par nübur tashiyim amshia meyipa shilangba anioktsü Afghanistan dak tashi peria malitsü ta tekum dangtsü ashir. Iba linük nungya Pakistan nungi nisung jenti meyipa shilangba agi tim atemer, kong Afghan nunger meyirijang aika meyipa yoker.

Asian Shooting Championships: Saurabh-Suruchi nati bronze angu



Luroi/August 20, 2025 (Agencies): India nunger shooter Saurabh Chaudhary aser Suruchi Inder Singh nati Bodhbarnü Asian Shooting Championships nung 10m air pistol mixed team event nung bronze medal nguogo.

Chaudhary aser Singh nati Chinese Taipei nunger tarep Liu Heng-Yu aser Hsieh Hsiang-Chen na 17-9 agi koka, Mongolbarnü Manu Bhaker-i tetsür 10m air pistol event nung bronze medal ka ngur aliba nung ano medal ka bendenloksüogo.

Medal round atema qualifier nung India nunger tarep ya pongububa nung liasü. Suruchi-i point 292 aser Saurabh-i point 286 ngua liasü. Qualification round nung tena

senteper point 578 ngua pongububa nung team ti asayaba medal round-i ia liasü.

Suruchi, shibai taküm kanga junga asaya-a World Cup medal pezü ngur lir, lai qualification round opening series nung perfect 100 angu saka tanabuba series nung point 94 aser tasembuba nung point 98 ngua liasü. Chaudhary-ia, point 95, 96, aser 95 ngua liasü.

Kasa asayamung nung Mongolbarnü Bhaker-i tetsür 10m air pistol event final asaya nung point 219.7 ngua la tasembuba jenjang nung tembang.

Iba asaya nung China tsür Qianke Ma-i point 243.2 ngua gold medal angu aser Korea tsür Jiin Yang-i point 241.6 ngua lai silver medal ngua liasü.

Agishi küm 23 tain Bhaker-i qualifications nung point 583 ngua la tasembuba jenjang nung final-i ai. Qualifications nung Korea tsür Yejin Oh-i point 585 ngua la temaba jenjang nung liasü saka la ranking points atema dang toktepa liasü, anungji China tsür Qianxun Yao temaba jenjang nung final-i ai.

Esha Singh-a ranking points atema toktep aser lai point 577 ngua tekububa nung tembang aser Suruchi Singh 12buba nung liasü. Palak-a 17buba nung aser Surbhi Rao (RPO) 25buba nung tembanga liasü.

Team event nung Bhaker, Suruchi Singh, aser Palak nungeri point 1730 ngua tasembuba jenjang nung tembanga liasü.

Salah-i PFA player of the year naroküm agizükogo



Luroi/August 20, 2025 (Agencies): Mohamed Salah-i Mongolbarnü otsü tasenka yanglua pa Professional Footballers' Association (PFA) men's player of the year naroküm asem agizükba mezüngbuba asayar kümogo. Liverpool-i taoba season Premier League koka asayaba mapang teyari tulu agütsüba sülen pai iba naroküm agizüka liasü.

Egypt nunger asayar yagi goal 29 idaktsü aser assist 18 süja liasü. Taoba season Liverpool puri PL ya asaya

pezü asayatsü anunga lia koka liasü.

Salah-i iba naroküm ya 2017/18 aser 2021/22 season nunga ngur liasü.

Maneni arishi küm 33 tain asayar yagi ita ishika tsünga Football Writers' Association aser Premier League player of the year awards dena ngur lir.

Kasa mapang nung Aston Villa nungi asayar Morgan Rogers nem young player the year naroküm agütsüogo. Taoba season kanga junga asayaba sülen pa England indang senior team nungia

asayaogo.

2024/25 PFA Premier League team nung Salah den Liverpool nungi Virgil van Dijk, Ryan Gravenberch aser Alexis Mac Allister nungera densema lir.

Milos Kerkez, shiba June ita Bournemouth nungi Anfield-i ogo pa-a shimogo aser Arsenal nungi asayar William Saliba, Gabriel Magalhaes aser Declan Rice nungera team nung densema lir.

Nottingham Forest nungi asayar Matz Sels aser Chris Wood na aser Newcastle striker Alexander Isak shiba Golden Boot atema tetoktepa nung Salah sülen tanabuba jenjang nung liasü parnoka PL team nung densema lir.

Tetsürtem rongnung Arsenal nungi asayar Mariona Caldentey nem women's player of the year naroküm agütsüogo. Lai Champions League nung club atema tongtibang shilem agia liasü.

Spain tsür la yagi Champions League nung goal ti idaktsüba densema tetoktepa ajak nung goal 19 idakja liasü.

Tebur Asia Cup atema HI-i asayar sangdongogo

Luroi/August 20, 2025 (Agencies): Taruba Hero Men's Asia Cup atema Hockey India-i Bodhbarnü asayar 18 agi kümteba Indian Men's Hockey squad sangdongogo. Iba asayamung ya Bihar kübok Rajgir Hockey Stadium nung August 29 nungi September 7 tashi asayatsü.

Iba asayamung ya FIH Hockey World Cup Belgium-Netherlands 2026 atema qualifier ka lir aser iba asayamung nung India team Pool A nung Japan, China, aser Kazakhstan den ata lir. India team mezüngbuba asaya China den August 29 nü asayatsü aser iba sülen Japan den August 31 aser Kazakhstan den September 1 nü asayatsü.

Asayar tejen Harmanpreet Singh maneni India captain asütsü. Taküm iba asayamung atema team nung asayar tejentem timba shima lir.

Team shimba indang jembiba mapang Indian Men's Team Coach Craig Fulton-i, "onoki tajangshiba peria bener aliba team ka shimogo, shirnoki

pressure aika aliba mapa koma asayatsü aji angateta lir. Asia Cup ya onok atema kanga tongtibang lir, kechiyong iba ya World Cup atema qualifier ka lir anungji onoki asayar tajungtem nüngdaker."

"Team kanga liromedema shimetogo aser iba atema ni pelar. Defence, midfield, aser attack ajak nung lenirtem lir. Team yagi ka kuma longjemer asayatetra aji onok tashi tulutiba aütsü," ta pai shisem.

Men's Asia Cup 2025 atema Indian Hockey

Team:

Goalkeepers: Krishan B Pathak, Suraj Karkera

Defenders: Sumit, Jarmanpreet Singh, Sanjay, Harmanpreet Singh, Amit Rohidas, Jugraj Singh

Midfielders: Rajinder Singh, Raj Kumar Pal, Hardik Singh, Manpreet Singh, Vivek Sagar Prasad

Forwards: Mandeep Singh, Shilanand Lakra, Abhishek, Sukhjeet Singh, Dilpreet Singh

Alternate Athletes: Nilam Sanjeep Xess, Selvam Karthi.

US Open tarep temeyoktep asaya nung Swiatek-Ruud na semi-i iogo



Luroi/August 20, 2025 (Agencies): Bodhbarnü US Open tarep temeyoktep asaya nung Iga Swiatek aser Casper Ruud nati quarterfinal nung Caty McNally aser Lorenzo Mussetti na koka semifinal-i iogo.

Swiatek aser Ruud nati mezüngbuba round nung minute 40 dang agia America nunger tarep Madison Keys aser Frances Tiafoe na 4-1, 4-2 agi akok aser iba sülen minute 20 dang lir quarter-final nung McNally aser Musetti na 5-3, 4-2 agi koka liasü.

Swiatek aser Ruud na semifinal nung top seeds United States tsür Jessica Pegula aser Britain nunger Jack Draper na den asayatsü. Tenati Bodhbarnü semifinal nung Carlos Alcaraz aser Emma Raducanu 4-2, 4-2 agi koka liasü.

Pegula aser Draper nati mezüngbuba round nung Carlos Alcaraz aser Emma Raducanu

na akok aser iba sülen quarter-finals nung Russia nunger Daniil Medvedev aser Mirra Andreeva na koka liasü.

Medvedev aser Andreeva nati mezüngbuba round nung Novak Djokovic aser Olga Danilovic na 4-2, 5-3 agi straight set nung koker liasü.

Mongolbarnü US tsür Venus Williams aser la indang Reilly Opelka na Karolina Muchova aser Andrey Rublev nati 4-2, 5-4 agi tsükdakja liasü.

Kasa mapang nung Italy nunger champion Andrea Vavassori aser Sara Errani nati second seeds Elena Rybakina aser Taylor Fritz na 4-2, 4-2 agi tsükdaktsüogo.

Kasa asayamung nung world number one Jannik Sinner-a Katerina Siniakova den asayatsü liasü, saka pa Alcaraz den Cincinnati Open final asayaba mapang temang mejungi akümba sülen masayatetsüsa aküm.

BILEMDANGANG

“Temerenshi angubaji masü saka aibelena inyakbajang taaktsüka lir.”